

## COTEENU PABLO NAAJIONEE TESALÓNICA TIACAJINIA QUINIAA PUEYASO PUEYACUARA

*Pablo saruhuatasacari Pueyaso pueya*

<sup>1</sup> Janiyari Pabloni. Janiyari nio naajiya Tesalónica tiacajinia quiniaa Pueyaso pueya maanuucuarani. Ni-aacujaari pa Que Pueyaso rupuejaca, pa Jiyaniijia Jesucristo rupuejacanio. Canaari mariyata nia saruhuataani, Silvano, Timoteonio. Pueyaso cuara maninia jiitiaara na cumaacata nijaniya, maninia nia quiniuria. Cuara nioojia cajitiirajuhuj, juhuajaniya nia quiniuria.

*Tesalónica pueyanaari Jesuucua tiuujiaca quiquiaari see-tanujuanaa*

<sup>2</sup> Maninia nia quiniuucua, canaari pueyaracaanu Pueyaso sequequiaani, “paacarasho”. Canaa secojonuusacari, canaari pueyaracaanu niaacuara secojonuuquiaani. <sup>3</sup> Pa Que Pueyaso canaa secojosacari, canaari pueyaracaanu niishiquiaa nijaniyani, taa pueyaracaanu nia poonijioquiaa Pueyatorani, Neyanuucua nia tiuuniuucua. Canaari niishiquiaajuhuj taa nia paniniutia nia naacuchiaa niarta pueyani. Naajuhuj, niaari maninia rejeretaquiaa taraatia nia miiniu, nia niishiniuucua pa Jiyaniijia Jesucristoori pocua niniutianihua. <sup>4</sup> Pueyaso panishano pueyanaa, canaacujaari niishiyani, nojuajaari nia saquiriojoquiaari na panishano muerasu nia quiniuria. <sup>5</sup> Canaa jaara nia niquiara pohuataquiaari Pueyaso rupaa Jesucristojinijini, cunoori maja najuhua pohuatasano quiquiaari. Canaa pohuatasanoori jyanohua Pueyaso cumaacaraca quiquiaari. Pueyaso Sohuanuuri jyanohua

poonijoriqiaa nioojiacajinia. Naacuajitij, niaari niishiquiaari canaa pohuatasanoori seetanu rupaajanaa. Niaacuajaari niishiya taa quijiaca canaa quiquiaari canaa quishacari niaatani, maninia Pueyaso muerasu nia quiniuria.

<sup>6</sup> Niaari canaacua jiaatiaquiaari, juhua canaa nia quiniuriajuhuaj, juhua pa Jiyaniijia Jesu nia quiniuriajuhuaj. Niaari seetanujuanaa naa miijiacara quiquiaari, Pueyaso tojjiaca nia quiniuriajuhuaj taa canaacuaani. Pueyaso rupaa nia tojishacari, niaari jiyanoohua na timitiaquiaari. Cunora, niaari jiyanoohua naquiya miishaaquiaari. Naajaa, Pueyaso Sohuanuuri nia cumaquiaari saaja, shuquiriaatia nia quiniuria. <sup>7</sup> Naa shuquiriaatia Pueyaso tojjiaca nia quiniuucuatej, niaari niarta Pueyaso pueya shiniuuiuquiaari, seetanujuanaa Pueyaso tojjiaca nojori quiniuriajuhuaj. Niaari naa shiniuuiuquiaari puetunu niarta Pueyaso pueyajanaa Macedonia jiyajinia quiniuatej, Acaya jiyajinia quiniaanio. <sup>8</sup> Pa Jiyaniijia rupaari niajanijini tucuacaanu paaquequiaari, maja saaja Macedonia jiyajinia, Acaya jiyajinianio. Cuno rupaari puetunu tiqiyocujanaa poojotasaaquiaari. Naacuajitij, puetunu tiqiyocua quijiaca pueyajanaari tari niishiya taa Pueyasoocua tiuujia nia quiya seetanujanaani. Naacuajitij, ¿canaatucua casaara niishitiojore Jesujiniji socuani, tee cuniqui pueya niishiya tari nojuajinijicujani? <sup>9</sup> Tee cuniqui canaa tiuquiquiaani, pueyari canaajiniji poojotanuya tari, taa Jesujiniji canaa pohaquiaaricua niajanijiani. Nojoriiri niishiyajuhuaaj taa canaa nia tiuquinitiaquiaari maninia nia tiacajiniaqueyani, canaa pohuatasano nia tojiniuria. Naajuhuaaj, niaanaari pueya shipinijosano nia jiyatesano nia pueyasora cartequiaari, pueyaracaanu rishijia seetanu Pueyasojanaa tojitiajaca nia quiniuria. <sup>10</sup> Naajuhuaaj, niaanaari Neyanu sashiya, jiyocuaaanuji na tiuquini-

uhuara, teyano Pueyaso samiitianiquiaariuhua macujini-jicuajani. Pueyari nijaniyajiniji niishiyajaacuhuj, Jesu-  
uri pocuaji Tacuna, maja mani quiquiojinia pa quejoosaa-  
nura, Pueyaso saniitiosacari na tojtiaashijiaca.

## 2

*Pablo niishitiosacariuhua pueya, taa na quiquiaari nojori-  
tiani*

<sup>1</sup> Cuarta Pueyaso pueyanaa, niaacuajaari niishiya, ma-  
jaari najuhuana canaa quiniu quiquiaari, niaata canaa  
quishacari. <sup>2</sup> Niaacuajaari niishiya, Filipo tiacajinia canaa  
quishacari, niaacua canaa tiuquiyaquishacarijia, canaari  
cuno tiacajinia sesacasaaquiaarini. Canaari jiyanohua  
taraatia miishaaquiaarijuhuaj. Naajuhuj, nia tiacajinia  
canaa tiuquiiijosacari, pueyari canaa pahuatasano ruure-  
taquiaari saaja. Naajaa, Pueyasoori canaa cumaquiquiaari  
juhua jiuujiaaju canaa pahuatanura Jesucristojiniji nia  
niquiarajuhuj. <sup>3</sup> Canaacuajaari niishiquiaarini canaa  
pahuatasanoori seetanu rupajanaa. Majaari canaa po-  
huatanu quiquiaari canaa miiniuria sesa nijaniya, canaa  
sapojonura nijaniyajuhuj. <sup>4</sup> Pueyasojuaanaari canaacua  
tiuuquiaari. Cunora, canaa jiyatequiaariiri Neyanujiniji  
pahuatanaa canaa quiniuria. Naacuajaari taa canaa  
poojotaquiaa pueya tiuuniuria nocuacuajani, Pueyaso  
jiyanooniuria nojori. Canaari seetanujuanaa Pueyaso  
timitiniu paniani, maja saaja pueya. Pueyasocujaari  
canaa jiuujia niishijia. <sup>5</sup> Niaacuajaari niishiyajuhuj,  
majaari canaa sapojonu quiquiaari nijaniya shanohua  
canaa sequesano, canaa nia maniniucuanura. Naa-  
juhuaj, majaari canaa cuaracashijionu quiquiaari nia-  
janiya, canaa nia niqutiojonura nia cumaneecajiniji.  
Pueyasoori na niishiyacuaja. <sup>6</sup> Majaari quenaaja canaa  
niishiriojonu quijia pueya timitiasano canaa quiniuria,  
nia timitiasano pueya canaa quiniurijuhuj. Maja.

<sup>7</sup> Canaacuajaari seetanujuanaa nia jiyaniijianucuaani, Jesucristo jiyaramiquishano pueya canaa quiniuucua. Naajaa, niaata canaa quishacari, majaari naa canaa miiniu quiquiaari niajaniya, juhua canaa seya nia quiniuria. Saniniuujia, canaari tojetaarucuajanaa juhua naatu-joori quiquiaarini, niaata canaa quishacari. Naatej, taa maaji jiitaa maninia necohuacuaani, canaari naa nia jiitiaquiaarijuuhaj. <sup>8</sup> Jiyanoehua canaa paniniuucua niajaniya, majaari saaja Pueyaso rupaa canaa pohuatanu quiquiaari niajaniya. Canaa cutaraari tama canaa cuaqueyajaaja panitiaquiaari niaacuarani, naajaa, canaa cuara puecoosaariaqui. Canaari naa jiitiaquiaari niajaniyani, jiyanoehua canaa paniniuucua niajaniya. <sup>9</sup> Cuarta Pueyaso pueyanaa, niaacuajaari niishiya taa canaa poonijioquiaari jiyanoehua, tama canaa panishanojuaaja canaa masetajara. Canaari naa poonijionuuquiaarini juuca, niucuanio, canaa pohuatanura Pueyaso rupaa niajaniya. Canaari naa miiquiaarini maja canaa taajetenura niajaniya canaa mashiniquijionuta nia cumaneeca.

<sup>10</sup> Naacuajitij cuarta Pueyaso pueyanaa, niajaniya, Pueyasojuhuj, niaacuajaari niishiya canaari saaja maninia miiquiaarini, niaata canaa quishacari. Majaari quenaaja canaa miiniu quiquiaari sesa. Naacuajitij, tamasaari maja na naata canacuara saquiriojotanu, canaa jaara tojetaarucuajanaa sesa miyaquiquiaarini.

<sup>11</sup> Niaari niishiyajuhuj taa canaa shiniujuquiaari niajaniyani Pueyaso nia tojiniuria. Niaari niishiyajuhuj taa canaa cumanijiaquiaari puetunu niajaniyajanaani taraatia nia quishacari, naatej, taa pueyano miiquiaa na panishano niquiohuacuaani. <sup>12</sup> Naajuhuj, canaacuajaari jiyanoehua nia nacasuquiaarini maninia miijiaca nia quiniuria juhua seetanujuanaa Pueyaso pueya. Pueyasocuajaari nia saquiriojoquiaari pueyaracaanu nata nia quiniuria, jiyaniijianucua nia quiniurajuhuj, juhua

nojuajuhuj. Nojuacuajaari na shacantuuca cumaacajinia quijia.

<sup>13</sup> Canaa jaara Pueyaso rupaa pahuataquiaari nia niqiarani, majaari nia jyaniniu quiquiaari cunoori saaja pueyajiniji canaa tojiniuushano. Maja. Ni-aari seetanujuanaa na tojitiajacara quiquiaari, nia ni-ishishacari cunoori seetanujuanaa Pueyaso rupaa culara. Canaari cunora canaa timiniutia sequequiaa Pueyasoni, “paacarasho”. Canaa pahuatasanoori seetanujuanaa Pueyaso rupaa. Naacuajitij, na rupaari nioojiajinia poonijioquiaa, maninia miijiacara na jataniniuria nijaniya, Jesuucua tiujujaca nia quiniuucua. <sup>14</sup> Naa Jesucristoocua tiujujaca nia quiniuucuatej, niarta pueyari nia miiquiaari naquiya, taa Judea jiyajinia parta Pueyaso pueya maapue miishaaquiaaricuaani. Tama narta Judiocuacajaari nia nojori miiquiaari naquiya, Jesucristo tojijaca nojori quiniuucua. <sup>15</sup> Nio cuarta Judiocuacani, nojori supuetanaajuhuj, nojoricuajaari pa Jiyaniijia Jesucristo motuquiaari. Nojori supuetanaari naa tariucuacaanu puecoquiaarijuhua Pueyaso sequesano caminiujiuniaa pueyatej. Naajuhuj, Jesuucua tiuyashijaca cuarta Judiocuacaari canaa taanuquiaari canaa Judea jiyajiniji. ¿Cuno pojoritiiri Pueyaso timitiasano? ¡Maja! Cuno pojoricuajaari juhua puetunu mijiria quiniaa paraajanaa. <sup>16</sup> Naacuajitij, canaa jaara taucuaca pahuatanu paniriquia Jesucristojinijini, Pueyaso pueyara nojori jiyatesaanurajuhuj, Judiocuacaari canaa tenujuquiaa juucuani. Naacuajitij, Pueyasora, sesa Judiocuaca miijosanoori tari tojetaarucujanaa puera. Cunora, Pueyasoori nojori saniitioquiaa jyanohua.

*Pablo naquerejosacari juucua Tesalónica tiacajinia quiniaa Pueyaso pueyacua*

<sup>17</sup> Cua panishano pueyanaa, canaacuajaari rupaquijiarania shuriucujaji quiaquiaarihuani. Jiyacari canaa

niquiyaquishacari niajaniya, naajaa, canaacuajaari juhua niaata quiquiaajaani, pueyaracaanu canaa niishiriojosacari niajaniya, niaacuara canaa secojosacari. Canaari juucua jiyanohua nia niqiniu paniriquiaani. <sup>18</sup> Cunora, canaari niaacua naquerejoquiaari juucuan. Janiyari niaacua naquerejonu pacutejoquiaarini. Satanásri canaa cushitioquiaari saajani. <sup>19</sup> ¿Janiyatucua casaara nia niqiniu paniyaquiriirini? Niaacuajaari jiyanohua cua timitiasano pueya. Pa Jiyaniijia Jesucristo tiuquishacariuhua, janiyari niishiyani, nojuajaari canaa shuquiritianutaniya maninia na tojijiaca nia quishacari canaa niishitiojonuucua na rupaa niajaniya. Pa Jiyaniijata pa quishacari, jiyacaritij, canaari jiyanohua nia timitianutaniyani, maninia na tojitiajaca nia quiniuucua mijiria. <sup>20</sup> Taaquiriirinj, canaacuajaari tari shuquiriaatia quiyani, maninia na tojitiajaca nia quiniuucua. Niaacuajaari seetanujuanaa canaa timitiasano pueya.

### 3

<sup>1</sup> Naa jiyanohua canaa niishiniu panishacari juucua niajanijajinijitij, majaari socua canaa sashiniu paniniu quiriquiaa. Cunora, canaari niishiriojoquiaarini, maniniacuajaari canaa jateenura tamajaaja Atenas tiacajinia. <sup>2</sup> Naacuajitij, canaari saaja parta Pueyaso pueyano Timoteo jiyaroquiaari niaacuaní. Nojuacuajaari jaarajaaja cuata poonijiona Pueyasora, Jesucristojiniji canaa pohuata-nura. Janiyari niaacua na jiyaroquiaarini na cumaquiniuria niajaniya, mariyata socua na shiniujiuniuria niajaniya Jesuucua nia tiuuniuria saaja. <sup>3</sup> Na jiyaroquiaarinijia na cumaquiniuria niajaniya maja quenaaja niquiriyatu niajanijajinijinio pishiniuria Pueyasooquaji, naquiya nia miishacari. Niaacuajaari tari niishiquiaari, paari naquiya miishiyani Jesucristoocua pa tiuuniuucua. <sup>4</sup> Canaa quishacari niaataja, canaacuajaari tari

nia numootequiaarini, puetunu pajaniyajanaari naquiya miishaanutaniyani Jesucristo tojitiajaca pa quiniuucua. Niaacuajaari niishiya, seetanujuanaa naa tohuatecanuuri cua sequesano. <sup>5</sup> Cua niishishacari niajaniyajiniji, niaanaari naquiya miishaaquiaa, janiyari puereriquiaani Sesaaca naasucua nia miitiriucuaa sesa. Jaara naa quiritij, puetunu canaa miishanojuanaa niaara maara najuhuana quiquianu. Naa cua tacaashacaritij, majaari socua cua tarishiniu paniniu quiquianu, niajaniyajiniji cua niishinuria. Cunora, janiyari ritia jiyarocanu niaacua Timoteoni, saniniuuja nojuaja pohuatanuhuaa janiya, niaate Jesuucua tiuyajaa.

<sup>6</sup> Timoteocujaari tari niajaniyajiniji tiuquiriohuacuaa. Nojuajaari canaa pohuatasuhuacuaa, niaanaari Jesuucua tiuyajaa. Niaanaari panitiojuaca quiyajaa. Canaa pohuatasuhuacuaajaarihuaj, niaanaari canaa niishiriojoquiaa jiyanohua nia paniniutia canaa. Niaanaari canaa niqiniuucua jiaatiaa, naatej, taa canaa jiaatiaa canaa niqiniuria niajaniyacuaani. <sup>7</sup> Cuarta Pueyaso pueyanaa, seetanujuanaa canaari taraatia miishiya niyani. Canaari tacayajuhuj. Naajaa, canaa niishishacari niaanaari seetanujuanaa Jesuucua tiuyajaa, canaari canaa jiuujia cajitiriucuaani. <sup>8</sup> Naa canaa tojishacari niaacuajitij, canaari juhua samiitiacorohuani, pa Jiyaniijia tojitiajaca nia quiniuucujaja. <sup>9</sup> Cunora, canaari jiyanohua nia shuquiritiaa Pueyaso niqiarani. Naacuajitij, majaari canaa niishiniu taate canaa naata sequenu nojuajani “paacarasho”. Naa maninia nia quiniuucuatej, canaari jiyanohua shuquiriaatia quiyani. <sup>10</sup> Naajuhuj, canaari juuca, niucua secujoquiaa Pueyasoni, nojuaja cuaara canaa tiuquitihuara niaacua. Canaari maninia nia niishitiojonu tucuatanu paniyani, seetanujuanaa maninia jeenucuasano Pueyaso pueya nia quiniuria.

<sup>11</sup> Canaari paniyani pa Que Pueyasojuanaa, pa Jiyani-

ijia Jesucristonio, nojori cuaara canaa naacuura niaacua canaa tiuquiniuria. <sup>12</sup> Pa Jiyaniijia cuaara nia jiyateera socua jiyanohua panitiojuaca nia quiniuria, tamasa panijiaca nia quiniurijuhuj, taa canaa paniya nijaniyacuaani. <sup>13</sup> Naa panijiaca na jiyatesacari nijaniyatej, niaari nioojia niqijioteyashijiaca quiniutianiya cutara. Naajuhuj, niaari tojetaarucujanaa sesa miyashijiaca quiniutianiya, pa Jiyaniijia Jesucristo tiuquishacariuhua puetunu na jiyanooshano pueyatajanaa.

#### 4

##### *Taate pa naata Pueyaso shuqiritiniuni*

<sup>1</sup> Quiarijiani cuarta Pueyaso pueyanaa, pa Jiyaniijia Jesu jiyaramiquishano pueya canaa quiniucua, canaa sequesano nia tojiri. Quiarijiani, canaari nia shiniujyani socua maninia mijiaca nia quiniuria. Canaari nia niishitiojoquiaari maninia mijiaca nia quiniuriani, Pueyaso nia shuqiritiniuria. Niaacuajaari naa maninia miya.

<sup>2</sup> Niaacuajaari canaa rootasano pa Jiyaniijia Jesujiniji niishiya tari. <sup>3</sup> Canaacuajaari nia rootaquiaarini, Pueyasoori nia panitiaa saaja nera nia quiniuria, tojetaarucujanaa maninia jeequesano nia quiniuria sesa nia miishanojiniji. Majaari nia numuetucunu nia camishoo maaji.

<sup>4</sup> Puetunu mashiqiorijianaa cuaara niishiiria maninia na cojuanura necocuarano, maja ritia na numuetucunura, nata na camiyaquishacarijia. Cuaara na cuaqueya panishano rejetenu niishiiria. <sup>5</sup> Majaari sacuaraatia nia miniu taa Pueyaso niishiyashijiaca pueya miiquiaacuaani, jiyanohua nojori jiaatiasacari maajiicua. <sup>6</sup> Naajuhuj, majaari quenaaja jiyasohuaja niarta pueyano niqiuocua nia numuetucunu, neyaca nia sapojonuta. Cuno maajicuaari saa neyacaraja, maja tamonura socua. Pueyasocuaari nia mijiaca saniitionutaniya jiyanohua, taa canaa numootequiaari tari nijaniyacujani. <sup>7</sup> Pueyasoori maja



na saquiriojonu quiquiaari pajaniya sacuaraatia miijiaca pa quiniuria. Pa saquiriojoquiaariiri tojetaarucujanaa sesa miyashijiaca pa quiniuria, saa neraja. <sup>8</sup> Naacuajitij, cante nio rootasano ruuretajani, nojuajaari maja saaja na rerequetenu nio rootasanojiniji pohuatana. Nojuajaari Pueyasojuanaa rerequeteya cutara, cante na Sohuanu niqutioquiaari nijaniyacujani.

<sup>9</sup> Quiar jijani cuarta Pueyaso pueyanaa, janiyara, najuhuanaruhua niaacuara cua naajionura cua niishitiniuria nijaniya, panitioojuaca nia quiniuria. Pueyasocujaari tari nioojiajinia nia niishitiquiaari panitioojuaca nia quiniuria. <sup>10</sup> Niaacuajaari seetanujuanaa puetunu Macedonia jiyajinia niarta Pueyaso pueya panijiaca quiyacuaja. Naajaa, cuarta Pueyaso pueyanaa, canaa nia tojiri. ¡Socua panijiaca nia quiril! <sup>11</sup> Tama nia cuaqueyajaaja nia cumaquiriquia juhuajaniya quijiaca nia quiniuria. Tama nia poonijosanojiniajaaja nia cojeriquia, tama nia juashiquiatajaaja nia poonijosacari, taa canaa rootaquiaari nijaniyacujani. <sup>12</sup> Naacuajitij, Pueyaso niishiyashijiaca pueyari nia rerequeteyaquiniutianiya. Naajuhuj, niari puetunu nia panishanojuanaa jitianutaniya.

### *Taa pa Jiyaniijia tiuquishacariuhua quiniutianiyan*

<sup>13</sup> Cuarta Pueyaso pueyanaa, canaari juhuacarijia nia tonu paniyani taa Jesuucua tiuujiaa shaajecono pueya miishaanutaniyani. Canaari nia niishitiniu paniyani maja nia taraajenura juhua Jesuucua tiuyashijiaca pueya. Nojoriiri maja na jitianu nojori Jiyano, nojori na samiitiani-jionuhua. <sup>14</sup> Paacuajaari niishiyani Jesuuri cusoquiaari. Na nuhuaji samiitiaquiaariuhuari. Naajuhuj, paari niishiyani, Pueyasoori Jesuucua tiuujiaa shaajecono pueya samiitianijionutaniuhua, nojori na rijionura Jesuta, Jesu tiuquishacariuhua.

<sup>15</sup> Canaajanaacujaari nia sequeyani, niocujaari pa Jiyaniijia niishitishano canaa: pajaniya, canapuate pa Jiyaniijia tiuquishacariuhua saminiucua quiniutianiya-jaani, majaari macunucua pa puetanu quiniutianiya pa Jiyaniijata pa naacuneetonura jiya cajiniocua. <sup>16</sup> Naa quiniutianiyari. Pa Jiyaniijia nakanuuri tojishaanutaniya, Pueyaso seya jiyaniijia nacanujuhuj, Pueyaso trompeta jonenenunio. Jiyacaritij, pa Jiyaniijajanaari jiyocua-caanuji rosenutaniya cohuaja najacajiniara. Jiyacari-jiuhuj, puetunujuanaa Jesuucua tiuujica shaajecono pueyari samiitiaconutaniuhua coteenu. <sup>17</sup> Na nuhuaji pajaniya, canapuate saminiucua quiyajaani, paari nojoritia ritia rijiosaanutaniya cohuaja najacajiniarani. Paari tii coquetonutaniya pa Jiyaniijata paratujiniani. Jiyacaritij, paari tari pueyaracaanu nata quijiacarano quiniutianiyani. <sup>18</sup> Cua panishano pueyanaa, nio cua pohu-atasanota nia cumanijatooriquia.

## 5

<sup>1</sup> Majaruhua maninia cua naajionura niaacuara cua niishitiniuria nijaniya socua, taacari pa Jiyaniijia tiuquiniutianihuani. Niaacuajaari tari na niishiya, naajuhuj, taate mijiria quiniutianiyani na tiuquiyaquishacarijia. <sup>2</sup> Niaacuajaari maninia niishiya, pueya jyanishacari juhuanojuaja maja pa Jiyaniijia tiuquiniu quiniutianihua, nojuajaari jiyacari tiuquiniutianiya. Nojuajaari canashiyaquiji tiuquiniutianiya, taa nohuasejojua tiuquiquiaa niucua tijajiniaacocuaani, juhuajaniya tia camaru maquesacari. <sup>3</sup> Naajuhuj, quera pa Jiyaniijia tiuquishacariuhua, mijiria quiniiaa pueyari naa sequejaca quiniutianiya: “Paacuja maninia quiyani. Shaaquicuja miaquetoojonu”. Canashiyaquiji jiyacari, Pueyaso saniitiosacari na tojiyashijicaari quiniutianiya. Naa quiniutianiyari

taa maaji nooquiaa juhuacatecara canashiyaquiji na manajacuaani. Majaari quenaaja niquiriyatu curosaanu quiniutianiya saniitiosoo. <sup>4</sup> Niajaniya saniniuujia cuarta Pueyaso pueyanaa, niaari maja juhua ninishiqui quijiaca, pa Jiyaniijia cariyatunura niajaniya. <sup>5</sup> Puetunu niajanijajanaacuaajaari cuhuashiqui quijiaca. Pueyasajuanaacuaajaari nioojiaca cuhuataquiaari. Majaari tari juhua ninishiqui quijiaca pueya pa quiniu. <sup>6</sup> Cunora, pa Jiyaniijia sashijiaca pa quirij. Maja juhua tamasacaja, juhuajaniya quiquioyari. Nojoriiri juhua maquetiuya. Pajaniya saniniuujia cuarta Pueyaso pueyanaa, juhua sutejaca pa quirij, maninia niishiriojojuacajuhuj. <sup>7</sup> Maquetujuacaari niucua maquetuquiaa. Naajuhuj, mashaasequenuujuacaari niucua mashaasequenuuquiaa. Naa miijiacaari Pueyaso tojiyashijiaca. Majaari na maniniucuanu cuhuashiqui. <sup>8</sup> Pajaniya saniniuujia, paari cuhuashiqui quijiaca cutarani. Naaratej, pueyaracaanu maninia niishiriojojuaca pa quirij. Romano pueya miaquetoosacari, nojoriiri turtuco cushiyonuujua, nocuaji na nujutajara cashi. Cumueeca casaa cushiyonuujuaariuhuj, na naca na cojuatajara. Naajuhuj, naa poojia pa cojuare, saaja Jesuucua pa tiuuniutia, seetanujuanaa panijiaca pa quishacarijuhuaj. Seetanujuanaa pa niishiri, Pueyasoori pa saquiriojoquiaari na muerasu pa quiniuria pueyaracaanura. Naacuajitij, pocua pa niishitiaja cojuareni, maja poojia pa niquijiotenura najuhuanaj. Naacuajitij, Sesaacaari maja na naata shocotanu quiniutianiya pajaniya. <sup>9</sup> Pueyasoori maja na saquiriojonu quiquiaari pajaniya na saniitiosocoriquiano. Pa saquiriojoquiaari cutaraari na jiyanooniuria pajaniya, na muerasu pa quiniuria, Neyanu Jesucristoocua tiuujia pa quishacari. <sup>10</sup> Neyanucuaajaari pocuara cusoquiaari, nata rishijiaca pa quiniuria pueyaracaanu. Naacuajitij, naajaa,

paa jaara cusoyareni, paa jaara saminio quiyajuhuaaj, pa Jiyaniijia tiuquishacariuhua, puetunu nocua tiuujiacajanaari pueyaracaanu saminio quiniutianiya nata. <sup>11</sup> Naaratej, pueyaracaanu nia cumaquitioojoriquia Pueyaso rupaata. Nia shiniujiutiooriquiajuhuaj, seetanujuanaa pa Jiyaniijia tojijiaca nia quiniuria, taa nia miiquiaacuaja tarini.

*Socua Pablo rootasacari Pueyaso pueya*

<sup>12</sup> Cuarta Pueyaso pueyanaa, canaa nia tojiri. Cuniqui nia jitianaa tojijiaca nia quiri. Majaari nojori rerequetenu. Nojoriiri jiyanoehua poonijioquiaa pa Jiyaniijia nojori niishitiojonura nijaniya, na nacasunura nijaniyajuhuaaj. <sup>13</sup> Cunora, jiyanoehua nojori nia paniri. Majaari na rerequetenu. Nojoriiri pa Jiyaniijia poonijioquiaa na cumaquiniuria nijaniya. Maninia nia quiri pueyanaa. Majaari juayonuujufanu.

<sup>14</sup> Nio nia tojirijihuaaj cuarta Pueyaso pueyanaa. Taa-jecori nia nacasure. Noojia niquijotejaca nia shiniujiuri, seetanujuanaa cumueeca Pueyaso pueya nojori quiniuria. Noo pojori nia cumaquiriquiajuhuaj, Satanás saniniujiushacari na cuaqueya miiniu panishano rejeretaashijiacatej. Majaari cuno pojori cartenu. Nia juaaniu nia rejeteriquia, maja quenaaja nia juaaniuria tamasacata.

<sup>15</sup> Naajuhuaaj, tama nia cuaqueyajaaja nia cojuariquia maja nia naminiuria niarta pueyano, nojuaja jaara sesa miiriquia nijaniya. Saniniuuja, pueyaracaanu maninia nia miitiooriquia niarta Pueyaso pueyata. Naa nia miiriquia puetunu pueyajuhuaaj.

<sup>16</sup> Pueyaracaanu nia shuquiririquia, Pueyaso pueya nia quiniuuca. <sup>17</sup> Naajuhuaaj, pueyaracaanu nia secojoriquia Pueyaso. <sup>18</sup> Naa jaara maninia miishaare, naa jaara sesa miishaarejuhuaj, naajaa, puetunu naa nia miishaanuu-cujanaa Pueyaso nia sequeriquia, “paacarasho”. Pueyasojuanaacuajaari naa paniya pa miiniuria, Jesucristo So-huanu pa jitianuucua poojiajinia. <sup>19</sup> Majaari Pueyaso

Sohuanu nia ruuretanu, nojuaja jaara nioojiajinia nia shiniujiya maninia nia miiniuria. <sup>20</sup> Naajuhuj, ma-jaari nia soonu Pueyaso sequesano caminiujiuniaa pohu-atasano. <sup>21</sup> Coteenu nia saniniujiuri cutara, nia niishini-uria seetanutejanaa nojori pohuatasano. Teyano nojori pohuatasanojinijiniote maniniani, cuno tojjijaca nia quiri. <sup>22</sup> Puetunu sesa niishishano casaajanaa soojeaca nia quiri. <sup>23</sup> Poojia cajitinia Pueyasojuanaa cuaara nia jeenu-cuaara juhuacarijia, tojetaarucujanaa sesa miyashijaca nia quiniuria pa Jiyaniijiaacuaji. Nojuaja cuaara naa cojuara nia sohuanu, nioojia, nia cuaqueyano, toje-taarucujanaa soosoo nia quiniuria pa Jiyaniijia Jesu-cristo cuaara tiuquiriohuajaatijia. <sup>24</sup> Cante nia saquiriojo-quiaaricujaja na pueya nia quiniuriani, nojuajaari puetunu shusha cua sequesanojuanaa niajaniya miiniutianiya ni-aara. Nojuajaari maja na niishiniu na rupaa jatanu. Nojuaja cutaraari na sequesano miiija pueyaracaanu.

*Pablo sequesano na naajionee na tucuatascari*

<sup>25</sup> Cuarta Pueyaso pueyanaa, Pueyaso nia secojonu-uriquia canaacuarajuhuj.

<sup>26</sup> Canaara nia saruhuatate cuniqui quiniaa parta Pueyaso pueyajuhua nojori nia nujuunuta, seetanujuanaa Pueyaso paniniutia.

<sup>27</sup> Pa Jiyaniijia jiyaramiquishano cua quiniuucua, cua tojitiare pueyanaa. Nio cua naajionee nia serojore puetunu Pueyaso pueyarajanaa.

<sup>28</sup> Pa Jiyaniijia Jesucristo cuaara cumaquiiria nioojia. Cuaara naa quiiriatej.

Quiarinio pueyaso rupaa pa jiyaniijia Jesucristojiniji  
pueyano rupaajinia  
New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

### Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

